

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine, na 30. Sjednici Predstavničkog doma održanoj 21. juna 2012. godine, i na 19. sjednici Doma naroda održanoj 19. jula 2012. godine, donijela je

ZAKON O CARINSKOJ TARIFI

Član 1.

(Predmet Zakona)

Zakonom o carinskoj tarifi uspostavlja se tarifna i statistička nomenklatura i carinska tarifa Bosne i Hercegovine pod nazivom Carinska tarifa (u daljnjem tekstu: CT), s ciljem ispunjavanja potreba Carinske tarife Bosne i Hercegovine, statistike o vanjskoj trgovini i drugih politika koje se odnose na uvoz i izvoz robe, u i s carinske teritorije Bosne i Hercegovine (u daljnjem tekstu: BiH).

Član 2.

(Sadržaj CT-a)

(1) CT obuhvata:

- a) nomenklaturu roba koja je u skladu s Harmoniziranim sistemom i s Kombiniranom nomenklaturom koju koristi Evropska unija, oznake za posebne zahtjeve države i dodatne šifarske oznake;
- b) konvencionalne carinske stope (najpovlaštenija nacija - MFN) koje se primjenjuju na robu obuhvaćenu nomenklaturom;
- c) preferencijalne carinske stope u skladu s međunarodnim sporazumima koje je BiH zaključila s određenim zemljama ili grupama zemalja;
- d) privremene suspenzije i privremena smanjenja stopa, mjere zaštite domaće proizvodnje od prekomjernog uvoza, antidampinške i kompenzatorne mjere I privremene tarifne kvote;
- e) ostale mjere predviđene propisima BiH.

(2) Sastavni dio CT-a čine Opća pravila od 1. do 6. o svrstavanju roba u CT, kao i Pravila o jedinstvenoj carinskoj stopi.

Član 3.

(Struktura oznake CT-a)

Svaka oznaka CT-a sastoji se od desetocifrenog broja:

- a) prvih šest cifara odnose se na tarifne brojeve I podbrojeve nomenklature Harmoniziranog sistema u skladu s Međunarodnom konvencijom o harmoniziranom sistemu naziva i šifarskih oznaka robe, koju razrađuje i prati Svjetska carinska organizacija;
- b) sedma i osma cifra su u skladu s Kombiniranom nomenklaturom. Ako se oznaka dalje ne dijeli, sedma i osma cifra su "00";
- c) oznake za posebne državne zahtjeve su identificirane devetom i desetom cifrom, a prije njih stoji oznaka "ex". Ako se oznaka dalje ne dijeli, deveta i deseta cifra su "00";
- d) u posebnim slučajevima mogu se uvesti dodatne četverocifrene šifarske oznake za primjenu posebnih mjera koje nisu šifrirane ili nisu u cjelini šifrirane na mjestu devete i desete cifre.

Član 4.

(Druge oznake CT-a)

- (1) CT uključuje sve informacije koje se zahtijevaju da bi se ispunili ciljevi ovog zakona navedeni u članu 1. ovog zakona, uključujući i statističke.
- (2) Ostale mjere, u skladu s članom 2. stav (1) tač. d) i e) ovog zakona su uključene korištenjem napomena i fusnota u dijelovima i glavama, ili na drugi način, kako je odgovarajuće.

Član 5.

(Nadležnosti u postupku usvajanja CT-a)

- (1) CT definirana u članu 2. stav (1) tač. a), c) i d) ovog zakona zasniva se na prijedlogu koji priprema Ministarstvo vanjske trgovine i ekonomskih odnosa BiH (u daljnjem tekstu: Ministarstvo), na osnovu konsultacija s Upravom za indirektno oporezivanje, a usvaja ga Vijeće ministara Bosne i Hercegovine (u daljnjem tekstu: Vijeće ministara BiH).
- (2) CT definirana u članu 2. stav (1) tač. b) i e) ovog zakona zasniva se na prijedlogu koji priprema Ministarstvo, na osnovu konsultacija s Upravom za indirektno oporezivanje. Ove propise usvaja Parlamentarna skupština Bosne i Hercegovine.
- (3) Uvođenje, izmjena ili dopuna carinskih stopa u CT-u za zemlje koje nisu članice Svjetske trgovinske organizacije vrši se putem zakona koji usvaja Parlamentarna skupština Bosne i Hercegovine.
- (4) CT definirana u članu 2. stav (1) tač. a) i c) ovog zakona usvaja se na godišnjem nivou, odlukom Vijeća ministara BiH u skladu s vremenskim rasporedom iz člana 6.
- (5) Vijeće ministara BiH će u CT-u propisati slučajeve i vrijednost robe na koje se može primijeniti jedinstvena carinska stopa od 10%.

Član 6.

(Rokovi u postupku usvajanja CT-a)

- (1) CT definiranu u članu 2. stav (1) tač. a) i c) ovog zakona priprema Ministarstvo do 15. novembra svake godine, usklađenu s Kombiniranom nomenklaturom koju objavljuje Evropska unija do 31. oktobra svake godine.
- (2) Prijedlog CT-a dostavlja se Upravi za indirektno oporezivanje, koja je dužna da, u roku od deset dana od dana prijema, mišljenje dostavi Ministarstvu.
- (3) Prijedlog CT-a dostavlja se Vijeću ministara BiH do 5. decembra svake godine, s blagovremeno dostavljenim mišljenjima.
- (4) Vijeće ministara BiH donosi odluku o usvajanju CT-a za narednu godinu do 20. decembra tekuće godine.

Član 7.

(Nadležnost za tumačenje i objašnjenje CT-a)

Ministarstvo je nadležno za tumačenje i objašnjenje CT-a, te davanje mišljenja o primjeni CT-a.

Član 8.

(Objavljivanje CT-a)

CT i svaka izmjena i dopuna CT-a bit će objavljena u "Službenom glasniku BiH" i na web stranici Ministarstva.

Član 9.

(Prijelazne odredbe)

Postupak izrade i donošenja prve CT bit će okončan u skladu s rokovima iz člana 6. ovog zakona.

Član 10.

(Prestanak primjene ranijih propisa i izuzeci)

Danom stupanja na snagu ovog zakona prestaju da važe:

- (1) Zakon o carinskoj tarifi Bosne i Hercegovine ("Službeni glasnik BiH", br. 1/98, 5/98, 7/98, 22/98, 31/02, 32/04, 48/05, 76/06, 35/09 i 14/10), osim:

- a) člana 6. Zakona o carinskoj tarifi Bosne i Hercegovine ("Službeni glasnik BiH", broj 1/98), koji će se primjenjivati do stupanja na snagu prve CT usvojene u skladu s ovim zakonom,
 - b) općih pravila, nomenklature robe, carinskih stopa i tarifnih kvota, navedenih u Zakonu o izmjenama i dopunama Zakona o carinskoj tarifi Bosne i Hercegovine ("Službeni glasnik BiH", br. 31/02, 32/04, 48/05, 76/06, 35/09 i 14/10), koje su ugrađene u Odluku o usaglašavanju i utvrđivanju Carinske tarife BiH za 2012. godinu ("Službeni glasnik BiH", broj 105/11);
- (2) Odluka o primjeni člana 2. Zakona o carinskoj tarifi Bosne i Hercegovine ("Službeni glasnik BiH", broj 6/98), koja će se primjenjivati do stupanja na snagu prve CT usvojene u skladu s ovim zakonom;
 - (3) Odluka o postupku carinjenja nesastavljenih proizvoda ili rastavljenih proizvoda čiji se dijelovi uvoze sukcesivno ("Službeni glasnik BiH", broj 6/98);
 - (4) Odluka o određivanju iznosa vrijednosti roba na koje se primjenjuje jedinstvena carinska stopa ("Službeni glasnik BiH", broj 6/98), koja će se primjenjivati do stupanja na snagu prve CT usvojene u skladu s ovim zakonom.

Član 11.

(Stupanje na snagu)

Ovaj zakon stupa na snagu osmog dana od dana objavljivanja u "Službenom glasniku BiH".

Broj 01,02-02-1-1/12

19. jula 2012. godine

Sarajevo

Predsjedavajući
Predstavničkog doma
Parlamentarne skupštine BiH
Dr. **Milorad Živković**, s. r.

Predsjedavajući
Doma naroda
Parlamentarne skupštine BiH
Dr. **Dragan Čović**, s. r.